



REPUBLIKA E SHQIPËRISË  
AUTORITETI I KONKURENCËS  
KOMISIONI KONKURENCËS

Nr. 36/prot.  
6

Tiranë, më 31.01.2023

VENDIM

Nr. 957, Datë 31.01.2023

**“ MBI AUTORIZIMIN E PËRQENDRIMIT TË REALIZUAR NËPËRMJET PËRFTIMIT TË KONTROLLIT TË PËRBASHKËT TË SHOQËRIVE BORE ARRAY LIMITED DHE NORTH IRISH SEA ARRAY WINDFARM LIMITED NGA GRUPI COPENHAGEN INFRASTRUCTURE PARTNERS DHE STATKRAFT IRELAND LIMITED.**

Komisioni i Konkurrencës me pjesëmarrjen e:

Z.	Denar BIBA	Kryetar
Znj.	Leida MATJA	Zv/Kryetar
Znj.	Adriana BERBERI	Anëtar
Znj.	Rezana KONOMI	Anëtar

Në mbledhjen e tij të datës 31.01.2023, shqyrtoi çështjen me:

**Objekti:** Autorizimi i përqendrimit të realizuar nëpërmjet përfutimit të kontrollit të përbashkët të shoqërive Bore Array Limited dhe North Irish Sea Array Windfarm Limited nga Grupi Copenhagen Partners dhe Statkraft Ireland Limited.

**Baza Ligjore:** Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”; Rregullorja “Për zbatimin e procedurave të përqendrimit të ndërmarrjeve”; Udhëzimi “Për formën e njoftimit të përqendrimit” dhe Formulari i njoftimit të përqendrimit.

**Komisioni i Konkurrencës**, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë së Tregjeve mbi njoftimin e përqendrimit të realizuar nëpërmjet përfutimit të kontrollit të përbashkët të shoqërive Bore Array Limited dhe North Irish Sea Array Windfarm Limited nga Grupi Copenhagen Partners dhe Statkraft Ireland Limited.

VËREN SE :

I. Palët në transaksion dhe procedura

Pranë Autoritetit të Konkurrencës u depozitua njoftimi se shoqëritë CI IV Irish Sea Holdco I Limited dhe CI IV Irish Holdco II Limited, synonin të blinin aksionet e shoqërive Bore Array Limited dhe North Irish Sea Array Windfarm Limited.

Referuar “Marrëveshjeve për Blerjen e Aksioneve”, palët pjesëmarrëse në transaksion janë:

### **Shoqëritë blerëse**

**CI IV Irish Sea Holdco I Limited** dhe **CI IV Irish Holdco II Limited** janë shoqëri private të kufizuara nga kuotat, të themeluara në Irlandë.

Shoqëritë CI IV Irish Sea Holdco I Limited dhe CI IV Irish Holdco II Limited janë shoqëri holding, të cilat synojnë të bëhen aktive në investime në projekte të gjenerimit të energjisë nga era në det të hapur (offshore). Këto entitete janë themeluar rishtazi dhe si të tilla nuk kanë aktivitete të mëparshme në asnjë fushë.

Shoqëritë e mësipërme janë pjesë e grupit Copenhagen Infrastructure Partners, një shoqëri administrimi e fondeve të investimit e specializuar në investimet në infrastrukturën energjetike. Grupi Copenhagen Infrastructure Partners është aktiv në projekte në një gamë të gjerë teknologjish, përfshirë energjinë nga era në det të hapur (offshore), energjinë nga era në tokë (onshore), energjinë diellore, biomasa dhe energjinë nga mbetjet, transmetimin dhe shpërndarjen, kapacitete ruajtje dhe magazinimi, dhe asete të tjera të energjisë.

Grupi Copenhagen Infrastructure Partners nuk është i pranishëm me filiale dhe nuk realizon të ardhura në Shqipëri.

### **Shoqëritë Target:**

**1. Bore Array Limited** është një shoqëri private e kufizuar nga kuotat, e themeluar në Irlandë. Bore Array Limited është një shoqëri projekti, filial i Statkraft e cila po kryen fizibilitetin e zhvillimit të Fermës së Erës në det të hapur (offshore) të Bore Array në bregun e Co. Wexford në Irlandë.

**2. North Irish Sea Array Windfarm Limited** është një shoqëri private e kufizuar nga kuotat, e themeluar në Irlandë. North Irish Sea Array Windfarm Limited është një projekt i gjenerimit të energjisë nga era në det të hapur (offshore) i propozuar në bregun e qyteteve Dublin, Meath dhe Louth në Irlandë, e cila do të sjellë një mundësi për të kontribuar në mënyrë të ndjeshme në zhvillimin e një të ardhme me energji të pastër, të rinovueshme në këtë rajon.

Shoqëritë target Bore Array Limited dhe North Irish Sea Array Windfarm Limited zotërohen 100% nga Statkraft Ireland Limited. Shoqëritë target nuk realizojnë të ardhura në Shqipëri.

### **Pala shitëse:**

**Statkraft Ireland Limited** është një shoqëri e kufizuar, e themeluar sipas legjislacionit të Irlandës. Statkraft Ireland Limited është shoqëri e zotëruar 100% nga Statkraft AS (shoqëria mëmë e fundit), një shoqëri lider në sektorin e hidroenergjisë dhe aktori më i madh i hidroenergjisë së rinovueshme në Evropë. Statkraft AS është një kompani hidroenergjitike, plotësisht në pronësi të shtetit norvegjez.

Grupi Statkraft është i pranishëm në Shqipëri, nëpërmjet filialeve të zotëruara tërësisht nga shoqëria Statkraft Markets B.V:

*Statkraft Renewables Albania SHPK* është një shoqëri me përgjegjësi të kufizuar, e themeluar sipas legjislacionit shqiptar, me objekt veprimtarie: veprimtari studimi, projektimi, ndërtimi, operimi dhe administrimi i impianteve fotovoltaike dhe i sistemeve të lidhura me to, për prodhimin e energjisë nga dielli, riparimi i tyre si dhe mirëmbajtja dhe mbështetja teknike etj.

*Devoll Hydropower SHA* është një shoqëri aksionare e themeluar sipas legjislacionit shqiptar, me objekt: planifikimi, ndërtimi, mirëmbajtja dhe funksionimi i tre njësive prodhuese hidroelektrike me një kapacitet të kombinuar të instaluar përafërsisht 319 MW në Luginën e Devollit midis lartësive 806 dhe 95 metra mbi nivelin e detit si edhe shitja e elektricitetit të prodhuar në Shqipëri dhe jashtë saj.

## **II. Përqendrimi**

Më datë 14 janar 2023, ndërmjet shoqërive *Statkraft Ireland Limited*; *CI IV Irish Sea Holdco I Limited* dhe *CI IV Irish Holdco II Limited* është lidhur “Marrëveshje për blerjen e aksioneve”.

Referuar kësaj marrëveshjeje, shitësi do të shesë titullin ligjor dhe përfitues të aksioneve të shitjes. Blerësi 1, *CI IV Irish Sea Holdco I Limited*, do të blejë titullin ligjor dhe përfitues të aksioneve të *North Irish Sea Array Windfarm Limited* dhe blerësi 2, *CI IV Irish Holdco II Limited*, do të blejë titullin ligjor dhe përfitues të aksioneve të *Bore Array Limited*.

Në përfundim të transaksionit, Grupi *Copenhagen Infrastructure Partners* dhe *Statkraft Ireland Limited* do të kontrollojnë bashkërisht shoqëritë target *Bore Array Limited* dhe *North Irish Sea Array Windfarm Limited*.

Për sa më sipër, transaksioni i propozuar konsiston në blerjen e propozuar të 50% të aksioneve të shoqërive *Bore Array Limited* dhe *North Irish Sea Array Windfarm Limited* nga Grupi *Copenhagen Infrastructure Partners*.

Transaksioni i njoftuar përbën një përqendrim në kuptim të nenit 10 dhe 12 të ligjit nr. 9121 datë 28.07.2003 “Për mbrojtjen e konkurrencës” dhe si i tillë është objekt autorizimi nga Komisioni i Konkurrencës.

## **III. Analiza e Konkurrencës**

Sipas nenit 3, pika 7, të ligjit nr. 9121, datë 28.07.2003 “Për mbrojtjen e konkurrencës”, si edhe Udhëzimit nr.76, datë 07.04.2008 “Për përcaktimin e tregut përkatës”, treg përkatës i produktit do të konsiderohet tregu i prodhimit të energjisë së rinovueshme nga era në det të hapur (offshore), por duke qenë se transaksioni nuk do të ketë ndikim në tregun shqiptar, tregu përkatës i produktit do të lihet i hapur. Treg përkatës gjeografik do të konsiderohet territori i Republikës së Shqipërisë.

Transaksioni i propozuar është përfitim i kontrollit të përbashkët të shoqërive *Bore Array Limited* dhe *North Irish Sea Array Windfarm Limited* nga Grupi *Copenhagen Infrastructure Partners* dhe *Statkraft Ireland Limited*.

*Bore Array Limited* dhe *North Irish Sea Array Windfarm Limited* janë të angazhuara në zhvillimin e projekteve për prodhimin e energjisë nga ferat e erës në det të hapur (offshore) në Irlandë.

Grupi *Copenhagen Infrastructure Partners* nuk është prezent dhe nuk realizon xhiro në Shqipëri.

Grupi *Statkraft* është prezent në Shqipëri përmes dy filialeve të saj *Statkraft Renewables Albania SHPK* dhe *Devolli Hydropower SHA*, të cilët operojnë në tregun e prodhimit të energjisë elektrike.

Përqendrimi i njoftuar nuk do të krijojë mbivendosje ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar dhe për këto arsye, transaksioni i synuar nuk do të sjellë ndryshim dhe nuk do të ketë ndikim në tregun shqiptar.

### PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të ligjit nr. 9121, datë 28.07.2003 “Për mbrojtjen e konkurrencës”,


### VENDOSI:

1. Të autorizojë përqendrimin e realizuar nëpërmjet përfimit të kontrollit të përbashkët të shoqërive Bore Array Limited dhe North Irish Sea Array Windfarm Limited nga Grupi Copenhagen Infrastructure Partners dhe Statkraft Ireland Limited.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

### KOMISIONI I KONKURRENCËS


**Leida MATJA**

---

Zv/Kryetar


**Rezana KONOMI**

---

Anëtar


**Adriana BERBERI**

---

Anëtar

**Denar BIBA**

---

Kryetar

